


A vertical decorative bar on the left side of the page, divided into five horizontal sections. The top two sections are yellow and contain a pattern of small white dots. The third section is red and contains a pattern of white circles of varying sizes. The fourth section is blue and contains a pattern of white dots. The bottom section is purple and contains a pattern of white squares of varying sizes.

GODIŠNJI IZVJEŠTAJ 2025

**SCHÜLER
Helfen
Leben**

IMPRESUM

Fondacija Schüler Helfen Leben / Učenici pomažu život

Godišnji izvještaj za 2025. godinu

Izdavač:

Fondacija Schüler Helfen Leben

Hamdije Kreševljakovića 18

71000 Sarajevo, Bosna i Hercegovina

Tel.: +387 33 550 660 | Fax: +387 33 550 661

web: shl.ba

Za izdavača:

Aida Bećirović, direktorica Fondacije Schüler Helfen Leben

Urednica: Aida Bećirović

Autorica: Maša Galić

Dizajn i izgled publikacije: Eldin Hasanagić

Fotografije: Arhiv Fondacije Schüler Helfen Leben

Sarajevo, juni 2026.

© **Fondacija Schüler Helfen Leben, 2026.**

Sva prava zadržana.

**SCHÜLER
HELFEN
LEBEN**

32

GODINE RADA S MLADIMA U BIH

SADRŽAJ:

- 5 RIJEČ UREDNICE
- 6 Zašto je rad s mladima važan u 2025. godini
- 7 SHL U BROJEVIMA
- 8 ŠTA SMO RADILI U 2025.
- 9 RAZVOJ MLADIH KROZ EDUKATIVNE SEMINARE
- 12 PRIČE MLADIH
- 13 Male ideje, stvarne promjene
- 16 KLJUČNI PROGRAMI I PROJEKTI
- 17 PARTNERSTVA I MEĐUNARODNA SURADNJA
- 18 REZULTATI U 2025.
- 21 Volonteri – srce SHL-a
- 22 FINANSIJE I TRANSPARENTNOST
- 24 POGLED NAPRIJED U 2026.
- 25 THEN VS NOW (1993 - 2025)
- 27 ZAVRŠNA RIJEČ

RIJEČ UREDNICE



Godina iza nas nije bila samo nastavak rada bila je podsjetnik na to zašto radimo ono što radimo. U 2025. godini Fondacija Schüler Helfen Leben (SHL) u Bosni i Hercegovini nastavila je graditi prostor u kojem mladi ljudi ne čekaju promjene, već ih sami pokreću.

U vremenu koje često donosi nesigurnost i osjećaj zastoja, vjerujemo da je ulaganje u mlade najkonkretniji oblik nade. Kroz programe obrazovanja, volonterizma, podrške omladinskim inicijativama i međunarodne suradnje, nastojali smo mladima ponuditi više od prilika dati im povjerenje, podršku i prostor da prepoznaju vlastiti potencijal i djeluju u svojim zajednicama.

Naš rad tijekom 2025. godine bio je usmjeren na tri ključna pravca: obrazovanje za aktivno i odgovorno građanstvo, jačanje kulture solidarnosti kroz volonterizam, te povezivanje mladih kroz međunarodnu suradnju i razmjenu iskustava. U svakom od ovih segmenata trudili smo se da ostanemo blizu stvarnim potrebama mladih slušajući ih, prilagođavajući programe i zajedno s njima tražeći odgovore na izazove koje donosi društveni kontekst Bosne i Hercegovine.

"Iza svakog broja u ovom izvještaju stoji mlada osoba koja je odlučila da ne čeka promjene već da ih sama pokrene."

Posebnu vrijednost našeg rada i dalje čine mladi ljudi koji su spremni izdvojiti svoje vrijeme, energiju i znanje kako bi doprinijeli drugima. Njihove inicijative, ideje i spremnost na djelovanje potvrđuju da solidarnost nije apstraktan pojam, već svakodnevna praksa koja mijenja zajednice iznutra.

Ovaj izvještaj predstavlja pregled onoga što smo zajedno ostvarili u protekloj godini ali i podsjetnik da iza svakog broja stoje ljudi, iskustva i male, ali važne promjene. Kao i uvijek, naš rad ne bi bio moguć bez povjerenja partnera, suradnje sa lokalnim zajednicama i obrazovnim institucijama te podrške svih onih koji vjeruju da mladi imaju snagu da oblikuju pravednije i otvorenije društvo.

Zašto je rad s mladima važan u 2025. godini



U Bosni i Hercegovini mladi odrastaju u društvu obilježenom nesigurnošću, odlascima, slabim povjerenjem u institucije i ograničenim prostorom za aktivno učešće. U mnogim lokalnim zajednicama mladi nemaju dovoljno prilika da razvijaju svoje ideje, uče kroz praksu, susreću vršnjake iz drugih sredina i osjete da njihov glas može imati stvaran utjecaj.

Upravo zato SHL nastavlja stvarati prostore u kojima mladi ne ostaju samo promatrači društvenih procesa, već postaju njihovi aktivni učesnici. Kroz neformalno obrazovanje, volontarizam, podršku omladinskim inicijativama i povezivanje mladih iz različitih dijelova Bosne i Hercegovine, SHL odgovara na potrebu za više povjerenja, solidarnosti i građanske odgovornosti među mladima.

SHL U BROJEVIMA

Naš doseg u 2025. godini



Mladi iz više od 30 lokalnih zajednica širom Bosne i Hercegovine bili su dio SHL programa u 2025. godini.

"Mladi iz više od 30 lokalnih zajednica širom Bosne i Hercegovine bili su dio SHL programa u 2025. godini."

Tijekom 2025. godine, kroz 11 realiziranih aktivnosti okupili smo više od 460 mladih ljudi iz različitih dijelova Bosne i Hercegovine. Paralelno s tim, podržali smo 13 omladinskih projekata koji su uključili dodatnih 850 učesnika, potvrđujući kontinuirani rast interesa i angažmana mladih u zajednici.

Ono što ove brojke čini posebno značajnim jeste njihova rasprostranjenost. Mladi su dolazili iz različitih lokalnih sredina, od većih urbanih centara do manjih zajednica, uključujući Tešanj, Orašje, Trebinje, Živinice, Kladanj, Banoviće, Cazin, Gračanicu, Goražde, Zavidoviće i Busovaču, ali i Zenicu, Kostajnicu, Konjic, Pale, Laktaše, Sarajevo, Donji Vakuf, Usoru, Gradišku, Banja Luku, Vareš, Gradačac, Bugojno, Bihać, Brčko, Travnik, Fojnicu, Livno, Hadžiće, Ilijaš i Lopare.

Ova geografska raznolikost svjedoči o tome da potreba za prostorom za učenje, povezivanje i djelovanje ne poznaje granice te da mladi širom Bosne i Hercegovine prepoznaju važnost aktivnog učešća u društvu.

ŠTA SMO RADILI U 2025.



Naš model rada:

od prve ideje do aktivne zajednice

SHL-ov pristup radu s mladima zasniva se na procesu koji povezuje učenje, iskustvo i konkretno djelovanje. Mladi u program najčešće ulaze kroz edukativne seminare, gdje se upoznaju s osnovama aktivizma, volonterizma, timskog rada i građanskog angažmana. Nakon toga, uz podršku trenera, mentora i SHL tima, razvijaju vlastite ideje i pretvaraju ih u konkretne projekte u svojim školama i lokalnim zajednicama.

Posebna vrijednost ovog modela je u tome što mladi ne ostaju samo učesnici aktivnosti. Kroz vrijeme preuzimaju odgovornost, vode timove, razvijaju nove inicijative, uključuju vršnjake i postaju dio šire mreže mladih koji djeluju širom Bosne i Hercegovine. Na taj način SHL ne podržava samo pojedinačne aktivnosti, već gradi kontinuitet omladinskog angažmana.

Učenje → Razvoj ideje → Mentorska podrška → Projekat u zajednici → Novi aktivisti/treneri

RAZVOJ MLADIH KROZ EDUKATIVNE SEMINARE

SHL je u 2025. godini, kroz niz tematskih seminara nastavio razvijati kompetencije mladih ljudi, pružajući im prostor za učenje, povezivanje i aktivno djelovanje. Programi su bili osmišljeni tako da odgovore na različite nivoe iskustva učesnika od onih koji se prvi put susreću s volonterizmom i aktivizmom, do mladih trenera i trenerica koji preuzimaju aktivniju ulogu u radu s vršnjačkim grupama.

Stand Up: Prvi koraci ka aktivizmu i zajedništvu

Seminar Stand Up usmjeren je na mlade s malo ili bez prethodnog iskustva, nudeći im osnovu za razumijevanje volonterizma i omladinskog angažmana. Kroz kombinaciju edukativnih i neformalnih aktivnosti, učesnici su imali priliku razvijati svoje prve ideje, ali i graditi međusobne odnose koji često predstavljaju ključ za daljnje uključivanje. Ovaj seminar se pokazao kao važan početni korak u osnaživanju mladih i njihovom uključivanju u širi SHL program.

Move On: Od ideje do konkretne inicijative

Na njega se nadovezao seminar Move On, koji je okupio kombinaciju prethodnih učesnika i novih članova, čime je stvoren dinamičan i izazovan prostor za rad. Kroz ovaj proces učesnici su razvijali konkretne projektne ideje, povezane s realnim potrebama njihovih lokalnih zajednica. Iako je grupa na dinamiku u početku bila suzdržana, kroz rad u manjim grupama i kontinuiranu podršku trenerskog tima učesnici su postepeno razvili veću sigurnost u izražavanju i saradnji, što je rezultiralo kvalitetnim i promišljenim inicijativama.

Boost Up: Gradnja tima koji pokreće druge

Poseban fokus bio je i na jačanju samog tima aktivista kroz Boost Up seminare, koji su imali ključnu ulogu u izgradnji kohezivne i funkcionalne grupe mladih aktivista.





Kroz ovaj proces formirana je nova struktura rada s novim članovima grupe, zasnovana na timskom djelovanju i podjeli odgovornosti kroz različite segmente od komunikacije i razvoja ideja do implementacije programa. Uvođenjem modela rotacije, novim članovima je omogućeno da razvijaju različite vještine i steknu cjelovit uvid u procese organizacije i realizacije aktivnosti.

"Od prvog koraka u aktivizmu do realizacije vlastitih ideja, 2025. godina pokazala je koliko brzo mladi prerastaju u pokretače promjena kada im se pruži prostor i podrška."

Power Up: Jačanje podrške mladima kroz obrazovni sistem

U segmentu rada s obrazovnim sektorom realiziran je seminar Power Up, namijenjen profesorima i stručnim suradnicima, s ciljem jačanja njihove uloge u podršci mladima. Iako su logistički izazovi, poput termina realizacije i ograničenog odziva učesnika, utjecali na dinamiku seminara, ovaj proces je otvorio važna pitanja za buduće planiranje i unapređenje pristupa radu s ovom ciljnom grupom.

Street Art: Kada kreativnost postaje društveni glas

Kao primjer inovativnog pristupa, realiziran je i Street Art seminar, koji je mladima ponudio drugačiji oblik izražavanja kroz spoj umjetnosti i aktivizma. U suradnji s kolektivom Obojena Klapa, učesnici su imali priliku učiti o ulozi street arta u društvu, razvijati vlastite ideje i iscrtati mural na SHL kući. Ovaj seminar je pokazao koliko kreativni pristupi mogu biti snažan alat za uključivanje mladih i otvaranje društvenih tema na pristupačan i vidljiv način.

Seminari realizirani tijekom 2025. godine potvrdili su važnost kontinuiranog rada s mladima kroz različite formate učenja od strukturiranih edukacija do iskustvenih i kreativnih procesa. Istovremeno, pružili su vrijedan uvid u potrebe učesnika i organizacijske izazove, koji će služiti kao osnova za daljnje unapređenje programa u narednom periodu.

Promo Tour: SHL bliže mladima širom Bosne i Hercegovine

Tijekom 2025. godine SHL je realizirao uspješan Promo Tour s ciljem da programe, mogućnosti i vrijednosti organizacije približi mladima u različitim lokalnim zajednicama širom Bosne i Hercegovine. U samo 10 dana SHL tim posjetio je 15 lokalnih zajednica: Mostar, Livno, Bugojno, Donji Vakuf, Travnik, Vareš, Ilijaš, Fojnicu, Kiseljak, Zavidoviće, Doboj, Brčko, Tuzlu, Kladanj i Vogošću.

Kroz direktne susrete sa srednjoškolcima, profesorima, pedagozima, direktorima škola, vijećima učenika, neformalnim grupama mladih i predstavnicima omladinskih organizacija, Promo Tour je okupio 308 učesnika. Ova aktivnost omogućila je SHL-u da predstavi svoje programe, seminare i mogućnosti za uključivanje, ali i da iz prve ruke čuje šta mladi prepoznaju kao ključne izazove u svojim školama i lokalnim zajednicama.

Posebna vrijednost Promo Toura bila je u neposrednom kontaktu s mladima. Kroz razgovore, anonimna pitanja, prezentacije i susrete, mladi su govorili o temama koje ih opterećuju — od nedostatka aktivnosti, slabog protoka informacija i manjka podrške odraslih, do ozbiljnijih izazova poput kockanja, ovisnosti, nasilja, nedostatka samopouzdanja i osjećaja nezainteresiranosti među vršnjacima. Ovi uvidi predstavljaju važan temelj za daljnje planiranje SHL programa, jer pokazuju da mladi ne trebaju samo informacije o prilikama, već i kontinuiranu podršku, prostor za izražavanje i osjećaj da ih netko ozbiljno sluša.

Promo Tour je također pokazao koliko su važne škole, profesori i lokalni kontakti koji prepoznaju vrijednost omladinskog angažmana. U mnogim sredinama SHL je susreo mlade koji su već bili dio prethodnih seminara i projekata, ali i nove učenike koji su se prvi put upoznali s mogućnostima koje organizacija nudi. Na taj način, Promo Tour je povezao postojeću SHL mrežu s novim mladima, školama i lokalnim partnerima.

Posebno ohrabruje činjenica da su se nakon Promo Toura mladi iz posjećenih zajednica počeli prijavljivati na SHL aktivnosti, što potvrđuje da direktan rad na terenu ima stvaran efekat. Ova aktivnost pokazala je da SHL ne čeka da mladi sami pronađu prilike, već aktivno ide prema njima, sluša njihove potrebe i otvara prostor za novo uključivanje.

Promo Tour je tako postao mnogo više od promotivne aktivnosti. Bio je to proces povezivanja, slušanja i razumijevanja mladih širom Bosne i Hercegovine — važan korak u jačanju vidljivosti SHL-a, ali i u daljnjem razvoju programa koji odgovaraju stvarnim potrebama mladih.

Više informacija o SHL-ovim aktivnostima možete pronaći na web stranici www.shl.ba.



PRIČE MLADIH



Promjene u zajednici često počinju jednostavnom idejom onim trenutkom kada mladi ljudi osjete da nešto može i treba biti drugačije. Upravo u takvim trenucima, SHL postaje prostor podrške, ohrabrenja i konkretne prilike da se ideja pretvori u djelovanje.

Kroz seminare i programe, mladi stječu znanja, ali i ono važnije samopouzdanje da naprave prvi korak. Za mnoge od njih, to je prva akcija koju pokreću, prvi put da preuzimaju odgovornost i prvi put da vide kako njihova inicijativa može imati stvaran utjecaj.

Te promjene možda na prvi pogled djeluju male uređena školska prostorija, obnovljen javni prostor, pokrenuta inicijativa ili otvoren dijalog u zajednici. Međutim, za mlade koji ih pokreću, ali i za ljude koji ih okružuju, one predstavljaju mnogo više: osjećaj pripadnosti, zajedništva i svijesti da je promjena moguća.

Vođeni željom da svoje okruženje učine ljepšim, sigurnijim i otvorenijim, mladi širom Bosne i Hercegovine kroz svoje akcije pokazuju da odgovornost prema zajednici ne dolazi s godinama već s odlukom da se djeluje.

Ovdje su njihove priče.

Male ideje,

stvarne

promjene

Kutak znanja i zajedništva - Cazin

Mladi iz Cazina odlučili su stvoriti prostor koji će njihovoj školi donijeti više od mjesta za odmor prostor za druženje, razgovor i zajedništvo. Inspiraciju su pronašli na SHL seminaru, a kroz vlastitu akciju naučili kako ideju pretvoriti u konkretan rezultat.

Iako su se suočili s izazovima poput nabavke materijala i organizacije, zajednički rad i podrška okoline doveli su do uspješne realizacije. Danas njihov projekt nije samo uređeni prostor već dokaz da mladi mogu oblikovati okruženje u kojem žive.

Novi kutak za miran trenutak - Donji Vakuf

Suprotstavljajući se stereotipu da mladi ne čitaju, učenici iz Donjeg Vakufa oživjeli su školsku biblioteku. Kroz zajednički rad uredili su prostor, prikupili knjige i stvorili mjesto za učenje i boravak.

Podrška škole i zajednice pokazala im je koliko je važno imati ljude koji vjeruju u ideju a rezultat je prostor koji danas koristi cijela škola.

Praktična nastava iz Kladnja - Kladanj

Učenici elektrotehničke škole odlučili su unaprijediti kvalitet nastave nabavkom opreme za praktični rad. Vođeni željom da svojim vršnjacima olakšaju učenje, pretvorili su ideju u konkretno rješenje koje ostaje generacijama.

Njihova akcija pokazuje da promjena ne mora početi velikim projektima već potrebom da se unaprijedi svakodnevno iskustvo u učionici.

Zelena ekonomija - Bosanski Petrovac

Kroz temu zelene ekonomije, učenici iz Bosanskog Petrovca spojili su znanje i društvenu odgovornost. Njihov cilj bio je približiti vršnjacima važnost održivog razvoja i zaštite okoliša.

Njihov rad prepoznat je i nagrađen maksimalnim brojem bodova na 6. Festivalu rada srednjih tehničkih i strukovnih škola, potvrđujući da mladi imaju kapacitet da otvaraju važne društvene teme.





Stvarajmo zajedno - Zavidovići

Učenice iz Zavidovića odlučile su urediti školski prostor koji služi za radionice i okupljanje mladih. Vođene željom za promjenom, okupile su veliki broj vršnjaka i zajednički realizirale projekt.

Iako su se suočile s logističkim izazovima, rezultat je bio prostor koji danas inspirira nove ideje i aktivnosti.

Kreativni zid - Fojnica

Iz osobne ljubavi prema umjetnosti, nastao je mural koji je promijenio izgled školskog prostora. Usprkos izazovima i nedostatku podrške u pojedinim trenucima, mala grupa učenika uspjela je realizirati ideju do kraja.

Njihov rad danas ostavlja vidljiv trag ali i snažnu poruku o upornosti i vjeri u vlastite ideje.

Kabinet 2.0 - Bugojno

Učenici iz Bugojna prepoznali su potrebu za modernizacijom prostora za praktičnu nastavu i odlučili djelovati. Kroz projekt su renovirali kabinet i unaprijedili uslove za učenje.

Ni oni nisu prošli bez izazova u organizaciji i komunikaciji, iskustvo im je pokazalo koliko zajednički rad može donijeti konkretne rezultate.

Zajedno na tribinama - Goražde

Dvije mlade učesnice odlučile su urediti gradski stadion u Goraždu i učiniti ga ljepšim i funkcionalnijim za sve korisnike. Uz pomoć volontera, očistile su prostor, obnovile ogradu i postavile kante za otpad.

Njihova akcija pokazuje da i male intervencije mogu značajno unaprijediti zajednički prostor.

Dobro se boljim vraća - Tešanj

Vođene željom da pomognu drugima, mlade aktivistkinje iz Tešnja organizirale su humanitarnu akciju za centar za osobe s posebnim potrebama.

Iako su se suočile s nedostatkom volontera, njihova upornost i motivacija rezultirali su uspješnom akcijom i snažnom porukom zajednici o važnosti solidarnosti.

Mural Nove generacije - Banja Luka

Mladi su kroz mural izrazili poruku zajedništva, prihvaćenosti i podrške. Proces rada bio je jednako važan kao i konačni rezultat učesnici su kroz njega učili, razvijali ideje i međusobno se osnaživali.

Pozitivne reakcije zajednice potvrdile su da umjetnost može biti snažan alat društvene promjene.

DoMore Debate - Mostar

Organizacijom debate, mladi iz Mostara otvorili su prostor za dijalog, razmjenu mišljenja i razvoj kritičkog razmišljanja.

Kroz ovaj projekt pokazali su da aktivizam ne mora uvijek biti fizička promjena prostora već i stvaranje prostora za razgovor i ideje.


Festival srednjoškolskog dramskog stvaralaštva - Konjic

Kroz 23. izdanje Festivala srednjoškolskog dramskog stvaralaštva Bosne i Hercegovine, mladi iz različitih dijelova zemlje dobili su priliku da kroz umjetnost izraze svoje ideje, emocije i poglede na društvo. Festival, u organizaciji Amaterskog pozorišta "Neretva" Konjic, okupio je mlade talente i otvorio prostor za razvoj kreativnih i komunikacijskih vještina.

Ova inicijativa pokazuje koliko umjetnost može imati snažnu ulogu u obrazovanju i socijalizaciji mladih ne samo kao forma izražavanja, već i kao alat za izgradnju tolerancije, međusobnog poštovanja i zajedništva. Kroz dramsko stvaralaštvo, učesnici su imali priliku ne samo nastupati, već i učiti jedni od drugih, širiti svoje horizonte i razvijati osjećaj pripadnosti zajednici.

Više informacija o SHL-ovim projektima podrške možete pronaći na web stranici www.shl.ba.

„Svaka ideja u ovom poglavlju počela je kao jednostavno pitanje: šta možemo promijeniti u svojoj zajednici?“



KLJUČNI PROGRAMI I PROJEKTI



Program omladinskog obrazovanja

Tijekom 2025. godine, Fondacija Schüler Helfen Leben nastavila je razvijati i provoditi svoj ključni Program omladinskog obrazovanja, koji predstavlja temelj našeg rada s mladima u Bosni i Hercegovini. Kroz ovaj program objedinjeni su obrazovni seminari, razvoj trenerskih kapaciteta, kao i podrška omladinskim inicijativama koje mladi pokreću u svojim lokalnim zajednicama.

Program je osmišljen kao proces od prvog susreta s aktivizmom, preko razvoja ideja, do njihove konkretne realizacije. Kroz različite formate neformalnog obrazovanja, mladi imaju priliku upoznati se s konceptima građanskog angažmana, razvijati kritičko mišljenje i stjecati praktične vještine koje im omogućavaju da aktivno sudjeluju u društvu. Poseban fokus stavljen je na povezivanje znanja i djelovanja, gdje edukacija ne završava seminarom, već se nastavlja kroz konkretne akcije i projekte koje mladi realiziraju.

U kontekstu Bosne i Hercegovine, gdje društveni narativi često ostavljaju malo prostora za zajedničke vrijednosti i građanski identitet, ovakav pristup ima dodatnu važnost. Kroz rad SHL-a, mladi dobivaju priliku da izađu iz okvira podjela i razvijaju osjećaj pripadnosti vrijednostima koje nadilaze etničke i nacionalne granice vrijednostima solidarnosti, odgovornosti i aktivnog građanstva.

“Beyond Borders: The BiH Empowerment Race”

Kao važan iskorak u 2025. godini, razvijen je i novi projekt „Beyond Borders: The BiH Empowerment Race“, koji predstavlja proširenje postojećeg programa i njegovu transformaciju u inovativan, interaktivan alat za učenje. Ovaj projekt osmišljen je kao kombinacija edukacije, igre i iskustvenog učenja, kroz koji mladi imaju priliku razvijati timski rad, međusobno povjerenje i razumijevanje različitih perspektiva.

Kroz takmičarske i kooperativne izazove, učesnici će imati priliku da preispituju postojeće društvene obrasce i grade nove načine suradnje, zasnovane na zajedničkim vrijednostima. Projekt ima za cilj da simbolično i praktično pokaže kako se društvene, etničke i mentalne granice mogu prevladati ne kroz teoriju, već kroz zajedničko iskustvo i djelovanje.

Razvoj ovog projekta odvija se u suradnji s mladima, edukatorima i stručnjacima, kroz radne grupe koje zajednički oblikuju njegov sadržaj, strukturu i poruke. Na taj način, ideja ne predstavlja samo novi projekt, već i prirodan nastavak SHL pristupa u kojem mladi nisu samo učesnici, već aktivni kreatori programa i društvenih promjena

PARTNERSTVA I MEĐUNARODNA SURADNJA

U 2025. godini, Fondacija Schüler Helfen Leben nastavila je jačati svoju međunarodnu prisutnost kroz strateška partnerstva i aktivno učešće u europskim inicijativama usmjerenim na razvoj omladinskog sektora. Kroz suradnju s organizacijama, institucijama i mrežama širom Europe, SHL je dodatno učvrstio svoju ulogu relevantnog aktera u oblasti rada s mladima, ali i otvorio nove prilike za razmjenu znanja, iskustava i dobrih praksi.

Međunarodno umrežavanje mladih

Učešće na omladinskom kongresu Act.ival for Future u Lübecku (Njemačka), u organizaciji partnerske organizacije SAME, omogućilo je predstavnicima SHL-a da budu dio globalne platforme koja okuplja mlade iz više od 40 zemalja. Kroz aktivno učešće u organizaciji i realizaciji programa, kao i kroz razmjenu iskustava s učesnicima iz različitih konteksta, dodatno su osnažene veze koje doprinose razvoju međunarodne solidarnosti i zajedničkog djelovanja mladih na temama društvene pravde.

Suradnja sa Vijećem Europe

Značajan iskorak u institucionalnom umrežavanju ostvaren je kroz suradnju s Vijećem Europe, gdje je SHL bio aktivno uključen u inicijative usmjerene na razvoj i unaprjeđenje omladinskih centara. Učešće na događaju Platforma 2025 u Luxembourgu otvorilo je prostor za povezivanje sa stručnjacima i predstavnicima omladinskih centara iz cijele Europe te dodatno pozicioniralo SHL kuću kao potencijalni prostor koji može zadovoljiti europske standarde kvaliteta u radu s mladima.

Quality Label i razvoj SHL trening centra

U tom kontekstu, važno je istaknuti da je SHL već od prošle godine dio mreže centara u okviru programa Quality Label for Youth Centres Vijeća Europe, te da je u 2025. godini aplicirao za dobivanje ove oznake kvaliteta za SHL trening centar. Ovaj proces ne predstavlja samo institucionalno priznanje, već i platformu za daljnji

razvoj suradnje s relevantnim akterima unutar Europske unije, kroz razmjenu znanja, zajedničke inicijative i jačanje standarda rada s mladima.

Dijalog i buduće inicijative

Ova suradnja dodatno je produbljena kroz posjetu visokih predstavnika Vijeća Europe SHL kancelariji u Sarajevu, gdje su razmatrane mogućnosti budućih zajedničkih aktivnosti, razmjene iskustava i razvoja novih programa. Poseban fokus stavljen je na ulogu omladinskih centara kao prostora za učenje, participaciju i izgradnju demokratskih vrijednosti, pri čemu SHL trening centar ima potencijal da postane prepoznatljiv model takvog djelovanja u regionalnom i europskom kontekstu.

Jačanje kapaciteta kroz edukaciju

Doprinos međunarodnom umrežavanju potvrđen je i kroz učešće SHL predstavnica na edukacijskom forumu u Magdeburgu, koji je okupio trenere i edukatore iz više europskih zemalja u okviru mreže centara za mlade s oznakom kvalitete Vijeća Europe. Kroz razmjenu pristupa, metoda i iskustava, ovaj forum je dodatno osnažio kapacitete SHL tima, ali i doprinio razvoju zajedničkih standarda u obrazovnom radu s mladima.

Kroz sve ove aktivnosti, međunarodna suradnja se pokazala kao ključni element razvoja organizacije ne samo kao prostor za učenje i povezivanje, već i kao prilika za pozicioniranje Bosne i Hercegovine unutar šire europske mreže organizacija koje aktivno rade na osnaživanju mladih i jačanju demokratskih društava.

“Suradnja ne počinje projektom ona počinje povjerenjem koje zajedno gradimo kroz zajedničke vrijednosti i rad s mladima.”

REZULTATI U 2025.

Tijekom 2025. godine, rezultati rada SHL-a ogledaju se ne samo u broju realiziranih aktivnosti, već i u promjenama koje su mladi pokrenuli u sebi, svojim školama i lokalnim zajednicama. Fokus našeg rada bio je na tome da mladi dobiju znanja, podršku i prostor da od ideje dođu do konkretnog djelovanja.

Kroz Program omladinskog obrazovanja, podršku omladinskim inicijativama, razvoj trenerskih kapaciteta i međunarodnu suradnju, SHL je nastavio graditi prostor u kojem mladi ne ostaju samo učesnici programa, već postaju aktivni pokretači promjena u svojim sredinama.

Rezultati u brojkama

U 2025. godini SHL je kroz svoje programe i podržane inicijative ostvario sljedeće rezultate:

460+

mladih učestvovalo je u edukativnim aktivnostima

850+

mladih uključeno je kroz podržane omladinske projekte

13

omladinskih inicijativa realizirano je širom Bosne i Hercegovine

30+

lokalnih zajednica bilo je obuhvaćeno SHL programima

Promo Tour

15

lokalnih zajednica, uz direktan susret sa

308

mladih

formirana je nova generacija trenera i aktivista kroz

Boost Up

mladi su razvili i implementirali

vlastite projekte

u školama i lokalnim zajednicama

oformljena je radna grupa za razvoj projekta

Beyond Borders:

The BiH Empowerment Race

ojačana je

suradnja

s međunarodnim partnerima i institucijama

Ovi podaci pokazuju širinu SHL-ovog rada u 2025. godini, ali i činjenicu da programi ne ostaju vezani samo za jedan grad ili jednu grupu mladih. Kroz aktivnosti, seminare i podržane projekte, SHL je došao do mladih iz različitih lokalnih zajednica širom Bosne i Hercegovine, uključujući i manje sredine u kojima su prilike za neformalno obrazovanje, aktivizam i omladinsko povezivanje često ograničene.

Šta se promijenilo za mlade?

Evaluacija provedena tijekom 2025. godine pokazuje da SHL programi za mlade ne predstavljaju samo edukativne aktivnosti, već iskustvo koje ih ohrabruje da djeluju, preuzmu odgovornost i aktivnije sudjeluju u svojim zajednicama.

Posebno su važni podaci da je 96% učesnika steklo praktična znanja primjenjiva u svakodnevnom životu, dok 94% učesnika navodi da su kroz SHL programe dobili znanja koja nisu mogli steći kroz formalno obrazovanje. Ovi rezultati potvrđuju važnost neformalnog obrazovanja kao prostora u kojem mladi razvijaju vještine, samopouzdanje i spremnost da naučeno primijene u stvarnim životnim situacijama.

Pored toga, 89% mladih razvilo je želju za većim angažmanom u društvu, a 91% njih smatra da svojim primjerom mogu inspirirati druge da se aktiviraju u zajednici. Ovi podaci pokazuju da SHL programi ne jačaju samo individualne kapacitete mladih, već i njihovu spremnost da preuzmu aktivniju društvenu ulogu i motiviraju druge mlade na djelovanje.

Važan rezultat programa je i razvoj ideja. 42% mladih razvilo je novu ideju kroz program, dok je 45% učesnika unaprijedilo već postojeće ideje uz podršku mentora i trenerskog tima. To pokazuje da SHL programi mladima ne nude samo znanje, nego i konkretan proces podrške — od prvog prepoznavanja problema, preko razvoja ideje, do njene realizacije u zajednici.

Programi su doprinijeli i povezivanju mladih. 89% učesnika navodi da su tokom aktivnosti stekli prijatelje s kojima će nastaviti surađivati. Ovaj podatak pokazuje da SHL programi stvaraju mrežu mladih koja traje i nakon završetka pojedinačnih aktivnosti, te da učesnici kroz program ne dobivaju samo nova znanja, već i podršku vršnjaka iz drugih sredina.

Posebno je važan podatak da je 89% učesnika naučilo nešto novo o vršnjacima iz drugih etničkih grupa. U društvu u kojem mladi često odrastaju u odvojenim obrazovnim, lokalnim i društvenim okruženjima, ovaj rezultat pokazuje da SHL programi stvaraju prostor za susret, razumijevanje i prevladavanje predrasuda.

Evaluacija također pokazuje da mladi nakon programa prepoznaju važnost zajedničkog djelovanja. 66% učesnika navodi da preferira rad u timu, 28% želi preuzeti lidersku ulogu, dok samo 6% preferira individualni angažman. Ovaj podatak potvrđuje da SHL programi jačaju kulturu suradnje, ali i otvaraju prostor mladima koji su spremni voditi procese u svojim zajednicama.

Šta se promijenilo u zajednicama?

Kroz podržane omladinske projekte mladi su tijekom 2025. godine uređivali školske i javne prostore, pokretali humanitarne i obrazovne akcije, otvarali prostor za debatu, kreativno izražavanje i društveni angažman.

Iako su projekti bili različiti po temi i obimu, zajedničko im je to što su polazili od stvarnih potreba mladih i njihovih lokalnih zajednica. U nekim sredinama rezultat je bio uređen školski kutak ili biblioteka, u drugima unaprijeđena praktična nastava, obnovljen javni prostor, mural s društvenom porukom ili događaj koji je otvorio prostor za dijalog.

Na taj način SHL-ova podrška ne završava samo na edukaciji pojedinaca. Ona se prenosi u zajednice kroz konkretne akcije koje ostaju vidljive i nakon završetka programa. Mladi kroz ove projekte uče da promjena nije apstraktan pojam, već proces koji počinje prepoznavanjem problema, okupljanjem tima i preuzimanjem odgovornosti za zajednički prostor.

Ovi projekti pokazuju da mladi, kada dobiju podršku i povjerenje, mogu prepoznati potrebe svoje zajednice i ponuditi konkretna rješenja. Bez obzira na to da li se radi o školi, javnom prostoru, kulturnom događaju, humanitarnoj akciji ili debati, svaka od ovih inicijativa predstavlja važan korak ka aktivnijim, odgovornijim i povezanim lokalnim zajednicama.

“Većina učesnika ne samo da se aktivira, već i inspirira druge mlade da se uključe u zajednicu. Znanja stečena kroz SHL programe učesnici doživljavaju kao praktična i primjenjiva u stvarnom životu.”

Rezultati iz 2025. godine potvrđuju da SHL-ov rad ima višestruki efekt: mladi stječu znanja i samopouzdanje, razvijaju ideje, povezuju se s vršnjacima iz različitih sredina i pokreću konkretne promjene u svojim zajednicama. Upravo ta povezanost između učenja i djelovanja ostaje jedna od najvećih vrijednosti SHL programa.

Volonteri – srce SHL-a



Priča Fondacije Schüler Helfen Leben počela je zahvaljujući mladim volonterima. Prije više od tri decenije upravo su srednjoškolci u Njemačkoj, vođeni željom da pomognu svojim vršnjacima pogođenim ratom na prostoru bivše Jugoslavije, pokrenuli inicijativu koja je prerasla u jednu od najvećih omladinskih organizacija koju vode mladi. Danas, kao i tada, SHL opstaje zahvaljujući energiji, posvećenosti i idejama volontera.

Svake godine srednjoškolci širom Njemačke sudjeluju u Socijalnom danu, kada na jedan dan napuštaju školske klupe i rade različite poslove, a svoju dnevnicu doniraju za financiranje projekata za mlade širom Europe. Mnogi od njih kasnije odluče napraviti i sljedeći korak – provesti godinu dana na volonterskom servisu u nekoj od SHL kancelarija u regiji.

Tijekom 2025. godine naš tim u Sarajevu imao je privilegiju da nastavi suradnju s Hannesom, koji je svoju volontersku službu započeo 2024. godine. Kroz svoj entuzijazam, kreativnost i iskren odnos prema mladima, Hannes je ostavio snažan trag u radu naše kancelarije. Njegove ideje, znanje i spremnost da uvijek preuzme odgovornost doprinijeli su unaprjeđenju brojnih aktivnosti, jačanju odnosa s mladima i razvoju novih pristupa u našem svakodnevnom radu. Njegov doprinos

bio je mnogo više od podrške projektima – postao je dio tima i zajednice koju SHL gradi u Bosni i Hercegovini.

Istovremeno, 2025. godina donijela je i jednu novu, jednako važnu priču. Dragana, nekadašnja učesnica aktivističke grupe Boost Up, započela je svoj volonterski servis u Njemačkoj, gdje je postala dio SHL tima koji organizira Socijalni dan – događaj iz kojeg se financiraju upravo programi poput onih u kojima je i sama nekada učestvovala. Njen put simbolično pokazuje puni krug koji SHL nastoji omogućiti mladima: od učesnika programa, preko aktivnog angažmana u zajednici, do preuzimanja odgovornosti za stvaranje novih prilika za generacije koje dolaze.

Takve priče podsjećaju nas da volontiranje u SHL-u nije samo podrška realizaciji aktivnosti. Ono predstavlja prostor u kojem mladi uče, razvijaju se, preuzimaju odgovornost i postaju pokretači promjena – u svojim zajednicama, ali i unutar same organizacije. Upravo zato vjerujemo da će se priče poput Hannesove i Draganine nastaviti razvijati i u godinama koje dolaze, potvrđujući da su volonteri i dalje najveća snaga SHL-a.

FINANSIJE I TRANSPARENTNOST


U 2025. godini ukupni budžet Fondacije Schüler Helfen Leben u Bosni i Hercegovini iznosio je 462.035,42 KM. Sredstva su korištena za realizaciju programa omladinskog obrazovanja, podršku omladinskim inicijativama, međunarodnu saradnju, razvoj novih programskih formata, promociju i operativnu podršku.

Poseban fokus bio je na tome da najveći dio sredstava bude usmjeren na direktan rad s mladima i aktivnosti koje stvaraju konkretan doprinos u lokalnim zajednicama.

Struktura budžeta po programskim oblastima

Udio pojedinačnih programskih oblasti u ukupnom budžetu

Grafikon 1: Struktura budžeta po programskim oblastima



Programska oblast	Iznos	Procenat
Omladinsko obrazovanje	231.418,07 KM	50%
Beyond Borders: The BiH Em- powerment Race	76.775,00 KM	17%
Međunarodna saradnja	25.401,13 KM	5%
Promocija i vidljivost	63.079,00 KM	14%
Logistika i operativna podrška	65.362,22 KM	14%

- Programsko ulaganje: 86%
- Administrativni i operativni troškovi: 14%

Ovakva struktura budžeta pokazuje da je Fondacija i u 2025. godini zadržala snažan programski fokus, uz odgovorno planiranje i transparentno korištenje raspoloživih sredstava.

POGLED NAPRIJED U 2026.



U 2026. godini Fondacija Schüler Helfen Leben nastavlja razvijati i unaprjeđivati svoj Program omladinskog obrazovanja, kao temeljni okvir rada s mladima u Bosni i Hercegovini. Kroz edukativne seminare, razvoj trenerskih kapaciteta i podršku omladinskim inicijativama, fokus ostaje na osnaživanju mladih da preuzmu aktivnu ulogu u svojim zajednicama i društvu u cjelini.

Istovremeno, 2026. godina donosi i važan iskorak kroz implementaciju projekta „Beyond Borders: The BiH Empowerment Race“. Ovaj projekt predstavlja inovativan nastavak postojećeg programa, s ciljem da kroz edukativne i interaktivne formate dodatno približi mladima vrijednosti saradnje, povjerenja i građanskog angažmana.

Centralni događaj projekta bit će velike sportke/edukativne „Igre bez granica“, koje će okupiti mlade iz različitih dijelova Bosne i Hercegovine u zajedničkom iskustvu učenja, takmičenja i suradnje. Kroz niz izazova i aktivnosti, učesnici će imati priliku razvijati timski rad, kritičko mišljenje i razumijevanje različitih perspektiva, ali i graditi odnose koji nadilaze lokalne i društvene podjele.

Kroz ove aktivnosti, SHL nastavlja graditi prostor u kojem mladi ne samo da uče o društvu, već aktivno sudjeluju u njegovom oblikovanju stvarajući temelje za otvorenije, solidarnije i demokratskije zajednice u budućnosti.

“Naš fokus ostaje isti - mladi koji ne čekaju promjene, već ih sami pokreću.”

THEN VS NOW (1993 - 2025)



Od humanitarne pomoći do pokreta mladih

Tada (1993 – početak)

Priča fondacije Schüler Helfen Leben u Bosni i Hercegovini počinje u najtežim vremenima, početkom devedesetih godina, kada su mladi volonteri iz Njemačke dolazili u zemlju pogođenu ratom kako bi pružili osnovnu humanitarnu pomoć.

U godinama koje su uslijedile, njihov angažman prerastao je u podršku obnovi kroz renoviranje škola i vrtića, prikupljanje sredstava i stvaranje uvjeta za povratak svakodnevnom životu.

Ali ono što je počelo kao solidarnost u kriznim vremenima, s vremenom je postalo nešto mnogo veće.

Danas (2025 – kontinuirani razvoj)

Danas, više od tri decenije kasnije, SHL u Bosni i Hercegovini djeluje kao organizacija koja osnažuje mlade da preuzmu aktivnu ulogu u društvu.

Kroz neformalno obrazovanje, razvoj omladinskih inicijativa i kontinuirani rad s mladima, fondacija je postala prostor u kojem se ideje razvijaju, testiraju i pretvaraju u konkretne akcije širom zemlje posebno u manjim lokalnim zajednicama gdje je podrška najpotrebnija.

*"Od pomoći u najtežim vremenima
do osnaživanja generacija koje dan-
as same pokreću promjene."*

Od osnivanja vijeća učenika, razvoja omladinskih organizacija i medijskih inicijativa, do podrške stotinama projekata i organizacije stotina seminara SHL je kroz godine ostavio dubok trag u razvoju omladinskog angažmana u Bosni i Hercegovini.

SHL trening centar – simbol kontinuiteta

Od kraja devedesetih godina, SHL trening centar u Sarajevu predstavlja srce svih aktivnosti fondacije. Izgrađena od strane mladih volontera i otvorena 1999. godine, ova kuća nije samo prostor ona je simbol zajedništva, učenja i aktivizma.

Danas, ista okuplja mlade iz cijele Bosne i Hercegovine i Europe. Ona je mjesto gdje nastaju ideje, razvijaju se projekti i grade odnosi koji traju i nakon završetka aktivnosti.

Kontinuitet djelovanja

Kroz godine, SHL nije odgovarao samo na potrebe mladih kroz redovne programe, već i na izazove trenutka od humanitarnih akcija do podrške zajednicama u kriznim situacijama.

Istovremeno, kroz podršku projektima iz oblasti umjetnosti, obrazovanja, zdravlja i aktivizma, fondacija kontinuirano širi prostor za djelovanje mladih i daje im priliku da ostave trag u svojim zajednicama.



ZAVRŠNA RIJEČ



Postoje godine koje se pamte po onome što je urađeno.
A postoje godine koje se pamte po ljudima koji su odlučili da ne odustanu.

2025. godina je upravo takva.

Kroz svaki seminar, svaku ideju i svaku akciju, mladi širom Bosne i Hercegovine pokazali su nešto što se ne može izmjeriti brojevima hrabrost da preuzmu odgovornost, da vjeruju jedni drugima i da, uprkos svemu, odluče djelovati.

Ovaj izvještaj nije samo pregled aktivnosti.
Ovo je dokaz da promjena postoji.
Da nastaje.
Da raste.

Vidjeli smo je u učionicama koje su postale mjesta ideja.
Na ulicama koje su dobile novu energiju.
U glasovima mladih koji su odlučili da se čuju.

I možda najvažnije vidjeli smo je u trenutku kada mladi prestanu pitati "može li se nešto promijeniti?" i počnu govoriti "mi ćemo to promijeniti."

Naša snaga nikada nije bila samo u programima.
Ona je u ljudima koji su odlučili da ostanu, da pokušaju, da stvaraju čak i kada je lakše otići ili odustati.

Zato danas ne govorimo samo o onome što je iza nas.
Govorimo o onome što dolazi.

Jer generacije koje dolaze ne traže savršen sistem
one ga grade.

I dok god postoje mladi koji vjeruju u zajedništvo, solidarnost i promjenu, postoji i razlog za ponos.
Postoji i razlog za nadu.

A ono što je možda najvažnije postoji budućnost koja nije slučajnost, nego rezultat odluka koje donosimo danas.

